

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Une propueste culturâl dai events ai cors di lenghe furlane, da la editorie a la scuele

Domenie ai 27 di Març dal 2022 a lis 9.30 a buinore tal Auditorium dal Centri Culturâl da lis Graciis a Udin si da adun la Assemblee dai socis da la Societât Filologjiche Furlane. Come ogni an si rive a chest apontament par fâ un bilanç no dome finanziari, ma ançe da lis ativitâts che la Societât e à inmaneât intal an passât e di chês in program pal an in cors. L'ordin dal di al previôt di fat l'esam e la aprovazion dal bilanç 2021 e dai documents di prevision pal 2022. Chest an si fasaran ançe lis elezions dai orghins sociâi che a vuidaran il Sodalizi pal trieni 2022-2024: Consei Gjenerâl, Consei dai Revisôrs dai conts e Probiôrs. "O vignin di un trieni cetant impegnatîf - al motive il President Federico Vicario - cu la celebrazion dal Centenari di fondazion tal 2019 e doi agns une vore dificii par vie da la emergjence sanitarie. Ma lis nestrîs fondis fuartis e la capacitât dai nestrîs colaboradôrs a àn permetût al nestrî Istitût di restâ il pont di riferiment par dut il Friûl, puartant indevant il lavôr di studi e di valorizazion di ogni aspiet da la nestre culture e identitât: lu pandin i risultâts ch'o vin otignût e il preseament di bande da la comunitât". L'incuintri si vierzarà cu la relazion morâl dal President, che al presenterà i moments plui impuartants des ativitâts fatis tal 2021 e intal ultin trieni, e al ripuararà in particolar lis tantis iniziativis editoriâls, formativis,



UN MOMENT DA LA "FRAIE DE VIERTE" TAI CJASÂI ZORUTTI A LONZAN DI DOLEGNE DAL CUEI, AI 26 DI JUGN DAL 2021.

Filologjiche in assemblee

Domenie ai 27 di Març il bilanç finanziari e da lis ativitâts e la elezion dai orghins sociâi pal trieni 2022-2024

promozionâls e progjetuâls che a àn impegnât il Sodalizi intal compit di pandi la culture, la lenghe e la storie dal Friûl. L'an passât, in particolar, la Societât Filologjiche e à tignût il Congrès sociâl a Vençon e la tradizional "Fraie de Vierte" a Dolegne dal Cuei. Dopo da lis dificolitâts dal 2020, il numar di events al è tornât a inçressi cu la VIII edizion da la "Setemane de culture furlane", la rassegne di iniziativis culturâls che cun

80 manifestazions, sedi in presince sedi on line, si è slargjate simpri di plui. Di là dai events, e je simpri impuartante pal Istitût la ativitât di didatiche e formazion, cui cors pratics di lenghe furlane realizâts cu la poie de ARLeF: par vie da lis normativis di sigurece sanitarie si à rivât a meti in pîts cors in presince in 13 comuns dal Friûl, cu la partecipazion di 170 corsiscj; cun di plui al à vût un grant sucès il cors pratic on

line, une gnove propueste par imparâ la lenghe furlane a distance, cu la partecipazion ançe di tancj forescj. Une vore impuartante e je ançe la ativitât da la Biblioteche sociâl, che e à slargjât il catalog in linie "Riviste friulane" - nassût cun chês di meti in rêt i contribûts in formât digiâl dai periodics locâi che a scrivin di teritori, storie, ambient, art, lenghe e culture furlane - cun "Il Noncello" e i "Quaderni friulani di archeologia". Cun di plui a son stâts digiâlizâts e metûts in linie i "Racconti popolari friulani", passe 2.300 contis da la tradizion orâl furlane publicadis in 22 volums dal 1968 incâ. La ativitât editoriâl, in plui da lis rivistis sociâls "Ce Fastu?", "Sot la Nape" e "Strolic furlan", tal 2021 e je lade indevant cu la publicazion di 24 monografiis gnovis. Par finî, la modalitât on line e à permetût di inçressi ançe la ativitât dal Docuscuele, il Centri al servizi da la scuele regionâl: a son stâts cetancj i apontaments di formazion pai insegnants, di presentazion dai materiâi didatics, di ativitâts di laboratori, di promozion da la lenghe furlane par lis fameis e par lis comunitâts locâls. La Assemblee si sierarà cu la presentazion dal document di prevision pal 2022, un an che al sarâ siôr di ativitâts: tra chestis la "Fraie de Vierte" a Cjassâ, che e sierarà une gnove edizion da la "Setemane de culture furlane" (dai 5 ai 15 di Mai) e il Congrès sociâl ai 2 di Otubar a Spilimberc.

Manifestazions in dut il Friûl e, a soreli jevât, ançe a Monfalcon, Cormòns e Guriza

Ai 3 di Avrîl si ricuarde la nassite da la Patrie dal Friûl



LA ACUILE DAL PATRIARCIE BERTRANT, DEVENTADE IL SIMBUL DA LA BANDIERE DAL FRIÛL.

Come ogni an, ai 3 di Avrîl il Friûl al ricuarde la sô fieste e al sarâ pussibil tornâ a inmaneâ cetantis iniziativis in dute la Patrie.

La mutivazion da la fieste e je cognossude: si ricuarde chel 3 di Avrîl dal 1077 cuant che l'imperadôr Indrî IV a Pavie (tornant indaûr di Canosse) al à dat il guvier dal Ducât dal Friûl in man al patriarcje di Aquilee Sigart, fasint nassi cussì la "Patrie dal Friûl", une entitât teritoriâl autonome jenfri dal Imperi che e restà in pîts fintremai al 1420.

La celebrazion uficiâl chest an si davuelzarà tal Comun di Vit, te pedemontane dal Friûl di soreli a mont, domenie ai 3 di Avrîl.

A son in program cetantis iniziativis par ricuardâ chest inovâl e ançe la Societât Filologjiche e inmanee manifestazions in cetancj paîs di dut il Friûl, sei in presince sei in modalitât on line, no dome dilunc dal mês di Avrîl ma fin al mês di Setembar.

Ai 2 di Avrîl si tacarà di buinore cun "Marilenghe & Mariscuele", la zornade da la scuele furlane rivade a la IX edizion che si tignarà on line seont un program une vore siôr che si pues cjatâ su www.docuscuele.it, il sît dal Centri regionâl di

documentazion, ricercje e sperimentazion didatiche che al à sede li da la Filologjiche. Simpri ai 2 di Avrîl a Monfalcon si presenterà il volum di Carlo Sgorlon "Marc d'Europe" voltât par furlan di Eddi Bortolussi. La iniziative, inmaneade dal Comun e dal Fogolâr Furlan in colaborazion cul Ente Friuli nel Mondo, si davuelzarà inte biblioteche a lis 5 sotsere.

La setemane dopo, vinaris ai 8 di Avrîl, a lis sîs e mieze sotsere si varâ la scree da la mostre fotografiche di Gian Piero Deotto "Brda Collio Cuei" inte sale civiche di Cormòns: e je une mostre sui panoramis dal Cuei jenfri Italie e Slovenie inmaneade da la Filologjiche inte suaze dal proget "Sine Finibus" promovût da la Deputazion di Storie Patrie pal Friûl.

Ju apontaments in Friûl di soreli jevât a laran indenant ançe dilunc dal mês di Mai, a Guriza, cu la scree da la mostre "Lis lenghis di Guriza" di Cjasa Ascoli - insiorade par furlan, todesc, sloven e inglès - e cu la cunvigne sui lûcs di confin e la presentazion dai "Ats de tierce cunvigne di toponomastiche" rincurâts di Enzo Caffarelli e Franco Finco e dal volum "La Toponomastica della Grande Guerra sul fronte carnico isontino" di Luca Caburlotto e Silvio Stok.